

北京日報

第百九十九冊

代表人朱漢

論說

二月十四日

論粵漢鐵路與津鎮鐵路

錄上海時報

粵漢鐵路橫跨三省之鐵路也津鎮鐵路亦橫跨三省之鐵路也粵漢鐵路若粵若湘若鄂我國重要之區域也津鎮鐵路若吳若魯若直亦我國重要之區域也粵漢鐵路自南而北與京漢之南幹接而商務盛交通便津鎮鐵路亦自南而北與京漢之北幹接而商務盛交通便顧粵漢收回自辦矣而津鎮則雖有廢約之議不能達其目的也是必有種種之原因在焉今試臚其說

甲說粵雄於資財厚於魄力者也湘鄂其人民咸堅忍鷙勇而任事也是皆此三省之不可及也是在紳

乙說粵漢有當道爲之出力若張督若梁使皆苦心瘁力以助之而津鎮無有也是在官

丙說粵漢所與交涉者美也美守門羅主義者也抑與我邦交最睦津鎮所與交涉者英德也雖爲英德而主動力在德德守鐵血主義者也方欲伸其權力於遠東是在所與交涉之國

丁說粵漢謀此者注意在營業故粵漢鐵路者商務上之鐵路也津鎮謀此者注意在勢力故津鎮鐵路者政治上之鐵路也是在謀路者之宗旨

以上數者語皆不爲無因然反覆求之竊猶有說

第一說謂紳不及粵湘鄂三省也似也然以我思之在鄉有某某也在京有某某也在外省有某某也何弱於三省也

以甯以此三省之紳而見笑於彼三省之紳者此第一說之不足據

第二說謂官不及粵湘鄂三省也是亦未當也粵漢之廢約誠得官力矣順以我之當道若慰帥若玉帥若蓮帥均負海內之人望而必謂此三省不及彼三省亦未免淺視人矣此第二說之不足據

第三說謂所交涉之國異也夫將謂美之厚我乎美果厚我者請觀華工禁約矣此第三說之不足據

第四說謂謀路者之宗旨不同也爲此說者謂彼之注意在商務夫商務果不能畧人土地乎則請觀印度此第四說之

不足論

抑我猶有說者粵漢正約也甯有正約可廢而豫約不可廢者粵漢已動工之鐵路也津鎮未動工之鐵路也甯有已動工之鐵路可廢而未動工之鐵路不可廢者然則津鎮而不能廢則將來交涉之棘手將有十倍於津鎮者百倍於津鎮者千萬倍於津鎮者

或曰子言贅矣今年之津鎮必如去年之粵漢收回自辦奚待言矣果爾則我爲去年之粵漢慶我復爲今年之津鎮賀

要緊新聞

慶邸宴饗各國公使○聞慶邸定於十九日邀請各國公使暨參隨繙譯人員宴會恩嘉賓戾止其歡洽必有逾於尋常者矣

警部堂諭之由來○日前警部下一堂諭傳知各工巡分局云聞有革命黨來京務飭嚴密查緝等語查此事之起因由舊金山有某華人宣言於外人謂革命黨業已派人至京貴國人之在京者屆時必須防避云云此語傳播各國故各國紛紛電致駐京公使公使警告外部外部即轉知警部故有此堂諭也

奉天近事○客從奉天來談該處近事數則 一日兵之守奉天城門昔已撤退 二新民屯之鐵路中國已收回自辦 三日人在奉天省城築鐵路穿城而過現經中國力與抗爭日人已不將此穿城之路行車大約將來可以贖回 四奉天將軍之辦公衙署向爲日軍所佔者現尙未肯交回刻下華官皆在奉天將軍宅內辦公事故地方很擠 五中國雖力爭森林之權利而日人擬另設植木公司 六日人極力經營鹽利 七馬賊雖言猖獗而聚則爲匪散則爲民剿之頗難其情形與廣西同

議復江省辦學○黑龍江將軍程留守日前上一摺奏係請江省辦學變通旗缺并用強迫教育如不入學酌量議罰該摺交政務處議奏現經政務處核議以原摺所議變通旗缺尙屬可行應請如所議辦理惟不入學議罰一節江省風氣未開只可用勸導之法不宜遽用強迫已於昨日復奏奉 旨依議

奏請免裁科道○王步瀛奏請添設科道各缺已紀前報茲悉又有翰林院編修劉廷琛上一條陳言科道缺不可裁減惟津貼在所應籌等語呈請掌院代奏該摺已交政務處併議此刻尙未復奏

請設分銀行于庫倫○庫倫辦事大臣延祉近有電致政府謂俄人在庫倫等處行用鈔票以紙易我現銀握我財政之權爲害甚大請速設戶部分銀行于庫倫以徐圖挽回云云

穿城鐵路之交涉○天津來函云日本新民屯至瀋陽穿城鐵路已由袁宮保派委鐵路總辦梁如浩查復現據稟稱此項鐵路彼云軍事上用何以搭客載貨顯與條約不符等語袁宮保已據情咨部請向日使交涉矣

教士謀官案十誌○天主教堂謀害縣官一案袁宮保奏派梁觀察敦彥赴南昌縣會同英法所派委員查辦一切已紀昨報茲復接九江專電知贛撫胡中丞亦已派委該省臬司余肇康會同糧道錫恩署鹽道沈曾植辦理此事

教士謀官案十一誌○法使因南昌鬧教一案近又親到外部聲稱此次南昌焚燬教堂該處左近駐紮官兵千名相隔甚近坐視不救實屬有心傷害茲將地圖一紙送閱應查取該文武地方官職名片革懲辦云云聞地圖所開教堂之東有武備軍營西北有練軍西南有巡警局云

教士謀官案十二誌○南昌專電云此間已拘獲天主教士一名其餘有在逃未獲者

教士謀官案十三誌○上海專電云江督周玉帥定於十三日由金陵起程赴贛查辦南昌教案所有督署事宜由恩新甫方伯暫行代理

電提新疆協餉助伊犁○伊犁團練兵需款奏請撥新疆攤款四十萬經部議准電咨該省在案茲查悉新疆所攤賠款向係由兩江江西兩淮協餉抵撥解滬故戶部日來又電致江督周玉帥謂伊犁需款奏准由陝甘藩庫動撥所有三省今年應解協餉毋庸解滬應解甘藩云云

義使保薦賽會委員○駐京義國公使以此次中國赴義賽會應聘用洋員以資贊助特保薦義人達斐祿襄辦中國赴賽事宜外部已電商駐義黃使

本京新聞

商部電飭赴義賽會○商部以本年義國米拉諾地方舉行漁業賽會除已奏派張季直殿撰所有沿海各省均派員隨同前往聞已電咨各省酌辦以爲振興漁業之助云

大學堂師範生改定出身○大學堂師範科卒業現在國子監已經裁併原有名目尙須酌改豈容沿襲舊名聞擬將最

優者作爲學部主事惟不能即行到部須盡義務五年期滿始准歸部學習緣大學堂學生皆尊預科輕師範故思有以矯之也

騰接修清道鐵路○刻聞政府商議清道鐵路迤西由柏山村至清化鎮僅有十二華里應飭鐵路大臣趕速接修以便行旅

改設均學堂爲初級師範○學部於初七日出示云國子監向辦之成均高等學堂所招之學生不能盡合高等程度應以該堂裁撤加籌經費改辦初級師範學堂即以原有之學生定於二月十五辰刻在國子監覆試如不合初級師範程度者即行撥入程度相當之學堂肄業

爲粵漢鐵路事派員入都○鄂督爲粵漢鐵路事辦法尙無頭緒而廣東又有官民衝突事橫生支節深恐牽動全局事廢半途籌慮甚切日前特派道台某公入都向樞府瀝陳情況兼懇維持聞並携有香帥手牘多件云

禮部實力整頓○禮部衙門自化私爲公之後歷年積弊爲之一清現在該署於收文處特派司員專任其事往來公牘毫無貽誤投文者亦無再受苛索之慮

戶部封奏○聞日前鐵大軍機遞一封奏係爲稽察戶部檔案痛陳本部利弊考核司員之勤惰整頓財政之不足並整頓崇文門稅務事宜及振興船政條陳洋洋數千餘言 兩宮未能細閱先將原摺留中

議築北新市場○東四牌樓至北新橋一帶向爲商賈雲集之處現在興修馬路頗多失業之人茲聞路工局擬於北新橋南戲館胡同空地內建造市場一區名曰北新市場其一切屬面均仿東安市場辦理以期安置商民

各省新聞

武昌近事四則○(湖北)武昌訪函西廠口啓秀女學堂乃私立之校也經理人劉邦驥以壓力爲女生段成英與即用知縣任承紀作伐以至大起風潮全體解散惜哉

蘇州將裁釐局改辦統捐特派知府揭傳琪來鄂查抄章程釐牙釐局總辦寶子年觀察已飭局中將所有辦法抄錄一分交揭携回蘇省

伊犁將軍長庚現擬調長於學務軍事者調十餘人赴邊以資贊助特咨請張宮保在屬員中選派前往聞湖北一時頗難其人廉幹者大抵均有優差不願前往平庸者欲往又不得派故也

刻下春茶上市江漢關道每日有五百金進款本任關道繼昌已升授湖南臬司張宮保本擬令繼侯茶市後交卸無如各候補道謀此缺者紛紛繼恐難久於其位聞當道擬以寶豐署理

改訂學務調查研究所辦法○(山東)上年調查研究所係借貢院開辦今仍移併學務處就閭公祠兩廳會議業經稟准撫帥以正月二十五日爲第九會期以後閱星期會議一次屆期午後一點鐘至五點鐘撫帥學台以及現任候補各官併各學堂監督堂長教員管理員等凡有指陳討論學校之事者俱請到會云

條陳建設縣治於南田島○(浙江)浙東甬台交界洋面之南田島茲奉部文據奏飭撫詳細查明具覆業經行知司道轉飭向隸該島之象山縣及石浦兩知等前往察勘地圖形勢復有人在省呈遞條陳謂該島不但據浙東海口門戶之要並且物產饒富向本設有保甲局由甯派員往辦兼及民間詞訟現下承乏者係田治秋大令澤琛每歲報差經徵地租七千餘金實已年盛一年數逾倍徙沿海利益如能提倡有人未可限量其寬廣則較江蘇之崇明尤大宜另立縣治如仍由象山縣兼轄恐有鞭長莫及之虞惟孤懸海外萬一海圻有事殊覺可慮或先開埠通商所陳甚爲詳盡

定期開辦勸業場○(湖北)兩湖勸業場頃已委李知州寶淦爲坐辦總辦黃太守日前已刊貼告示多張並分行各屬招商陳列其所定章程頗爲詳密聞準於三月初開辦

新軍全鎮之調查○(江蘇)江南選練兵處改編新軍一鎮現已布置就緒茲將全鎮營制將弁調查如下 督練公所兼兵備處事鹽巡道朱恩紱 參謀處兼教練處狼山鎮徐紹楨 武威新軍左右翼編爲步隊第一標統領徐紹楨 護軍正四旅改編第二標統領朱恩紱 常備右軍六營改編第三標統領副將陳煦亭 武威新軍六營改編第四標統領總兵龔炳魁 合字五營改編第五標統領總兵丁華容 南字三營改編第六標統領副將商德全 新湘九旅改編第七標統領參將李雲松 盛字五營改編第八標統領參將戴鶴松 代統都司張繼良 常備左軍一旅右軍馬隊一營合編爲馬隊一營 新從口外購回戰馬千匹 常備右軍砲隊工程隊各一營分編爲砲隊一營工程隊一營 新增設輜重隊一營新增設軍樂隊一隊

江西按察司余通飭各廳州縣不准捏飾月報公文○(江西)照得清訟章程月報五項格冊自理案件向與上控各案按月冊報分別依限逾限審結不結較計功過日久弊生各廳州縣往往取巧捏飾規避不可究詰光緒二十七年四月經檄前升司議以自理各案記功者多記過者少推原其故皆由自理之案無可稽查遂以自理之功藉抵上控之過是自理一項非特全不足憑而適為上控記過彌縫之計嗣後自理之案一概毋庸開造以省文牘詳奉撫憲批准通飭遵辦三十一年五月錫前署司因造辦各屬政事冊無憑稽肅詳請詞訟月報仍照舊章造冊呈送各在案第自理各案雖仍舊造報並不核記功過應不致再有從前捏飾等弊事本司到任以來查閱各屬月報冊內自理項下或多報以顯我折獄之才或少報以揚其清訟之美而實在項則多少大致月月相等亦若百姓預計一成之數以與訟官司亦預計一成之數以結案倘非相謀何以相合如此謂非捏飾其誰信之嗣後詞訟月報務當核實登載不准少報亦不准多報一月之後定當派員抽查一次或控案則提核其虛實倘冊有此案而民間無此案每案記過一次至十一次即行撤省如此嚴定章程庶牧令於自理案件不致捏其虛實而小民受惠多矣合行通飭仰即遵照景德鎮保樂兩軍改爲巡警○(江西)江省興辦警察苦於經費難籌景德鎮五方雜處尤宜亟辦刻經各大憲議以該鎮保樂兩軍保就地捐款募勇藉資彈壓已札浮梁縣將舊有口糧設法添募款項改辦巡警川漢鐵路發給息銀○(四川)川漢鐵路所收股本已數百萬每年行息四釐總公司特於去臘將各屬應領息款給發以昭大信

各國新聞

伊犂將開辦官報○(新疆)伊犁將軍長留守奏調黃觀察秀伯襄贊一切事宜現觀察以伊犁風氣未開擬創辦官報以資發達智識日前親自赴英購買機器借資遊歷一俟妥辦即由倫敦取道聖彼得堡經七河省逕返伊犁賑濟日本難民○(英國)現維多利亞政府(英屬哥倫比亞之首府)購運麵粉五十噸前往日本東北方賑濟難民德法會議摩國問題○(摩國)現在阿爾西亞會議摩國銀行問題甚為機密現在英法並無反對德政府之思想法首相魯威爾擬與德政府將摩國問題和平了結伊並擬維持法國政治因舊議院擬在西三月中旬解散英國調回戰艦○(英國)現聞英國海軍省擬將停泊地中海之戰艦八艘巡洋艦四艘調回以便編入北海之艦隊

英德訂定約款○(英國)英德兩政府已將訂定紐勞爾德地方之約簽字兩國可從此盡釋前嫌矣德政府推誠於中國○(德國)又云德政府聞中國有不安之耗因恐愈傳愈厲駭人聽聞故推誠心極力辯白謂為傳聞之不確以期人之聽之或不致有戒心云日本人謀設伐木公司○(日本)大阪市田中市太郎等二十九人計劃在鴨綠江等處設立伐木公司現已稟請日本外務省承允云云日本議院不允撤退巡警○(日本)日本米柔拋利敦(譯音)地方之人上稟議院請將巡警裁撤以便自行保衛地方現議院批駁不允所請俄國撤滿洲軍以平內亂○(俄國)俄政府現將駐滿洲陸軍大將庫瑞巴堪并巴山納夫二員調回俄國以便平治內亂俄國撤退滿洲軍消息○(俄國)西比利亞鐵路汽車每日開行六次故滿洲俄兵至西六月間當可如數撤回俄國撤日人入境禁○(俄國)俄國已撤除戰時所頒禁止日人入境之令滿洲近日撤兵情形○(俄國)日本軍既先撤陣地有陸續凱旋者而俄軍撤退之信頗為遲滯是蓋因本國之擾亂故緩其撤退者加天寒之際行動困難如火車煤炭缺乏之以薪陸上交通運輸之不便可知焉用由海路乎以海參威尚在冰凍期內不得已欲橫斷蒙古出於海邊自渤海灣開始海上輸送有所交涉於日軍然日軍不允故惟有待解冰期而已但據所聞已有十數萬兵員既向某地退還矣德皇游歷外國○(德國)德皇威廉擬於西四月間前往西班牙遊歷并擬往希臘國以赴歐蘭學克博覽會然後經地中海與英皇愛華務德相見云

調查

日本三十九年分歲入歲出總豫算表 (續)
三九一一五一六
二〇四四三二一
三九一一八六九五八
存金利息
日本三十九年分歲入歲出總豫算表
歲入總額統計

歲入臨時部
 官有物產（即公產）
 礦山收納金
 地所收納金
 建物（即房舍等物也）收納金
 物品收納金
 船舶收納金
 家畜收納金
 共計

五〇九〇
 三一七一七三
 五九六〇
 一一〇九二〇七九
 二七七七六三〇
 四九四七三
 一四二四七四〇五

雜收入
 海軍受託修造收入
 還償金收入
 清國賠償金收入
 共計
 地方分擔納付金
 橫濱港灣設備納付金收入
 公債募集金
 森林資本金收入
 前年分繰入金（即前年度餘額收入也）
 歲入臨時部統計

五七三一一九
 二二一九九六
 二四八三九五
 二八六八三九〇
 一九二九九八
 五〇〇〇〇〇
 八〇八四三二四二
 二二五一九三四
 九〇七六四五
 一〇一七一六一四
 四九二八九八五七二

（未完）

宮門抄

二月十三日吏部 翰林院 正黃旗值日 內務府 引 見四十名 出使大臣孫寶琦到京請 安 雷補同等
 謝署缺恩 植公續假二十日 召見軍機 孫寶琦

諭旨

二月十三日奉

旨太常寺卿著趙秉鈞補授欽此
 旨翰林院學士著許澤新補授欽此

批摺摘要

政務處一件

財政事宜王大臣本處會同戶部具奏整頓國法以防流弊一摺奉 旨依議

二月十一日

欽天監奏六月十五日食奏聞事單一件奉 旨知道了 又太常寺奏十八日祭 文昌廟後殿請派王行禮事奉
 旨派出訥勒赫 又奏祝祝版禮節事附比較時刻片一件時刻片二件奉 旨知道了 又奏行禮禮節事奉 旨
 知道了 又奏看版時刻線頭牌奉 旨知道了 領侍衛內大臣奏侍衛繼昌告假省親事奉 旨賞假兩箇月 值
 年旗奏正月分並無特旨交辦事件奉 旨知道了
 長春揀選驍騎校 著擬正之玉書補授餘著記名該衙門知道單併發 溥福隨印筆帖式期滿請留任 著該衙門
 知道 又軍台廢員潛逃請嚴緝 著該衙門知道

奏稿

調補江蘇巡撫兼管河工事務臣陳夔龍跪 奏為豫省課吏領現擬改為仕學館專設仕學速成科以資造就而裨佐

聖鑒事竊照七年承准政務處咨令各省於已辦之課吏館內添造講堂專設仕堂速成科查取直隸法政學堂章程酌地方情形認真辦理等因並准直隸督臣袁世凱咨送章程前來當即督飭兩司課吏館悉心商榷妥議定章竊維地方庶政非人莫舉況當此中外交通新機日闢理煩治劇之任斷非毫無閱歷者所能勝若不將從政之才實為儲蓄速為造就何以收集腋成裘之效應三年求艾之需此仕學速成科誠不容不早設也惟查直隸法政學堂聘用洋員為教習豫省開辦之始一切章程先求切實辦法庶幾易行俟一二年後再為次第推廣查河南原有課吏館係前撫臣錫良奏明開辦原訂章程尚屬核實臣到任以來隨時認真考核在館各員亦頗稱白濯磨第時隔數年近來一切新政多為往時所未有應即酌量增添期臻完備其稍涉空言無補以及窮年累月而莫可殫究者一律刪去總期學可致用名實相符現經議定將課吏館改為仕學館專設仕學速成科其課程約分八門曰修身曰刑法曰理財曰交涉曰學務曰警察曰地輿曰工藝大抵以中國政學為基礎以各國政學為進步仍照直隸辦法以六個月為一學期以四學期為畢業卒業獎勵亦照章分為三等至各項規則豫省庫儲支絀不得不量力辦理徐圖擴充館內擬不設監督即以藩臬兩司為督辦酌派道為總辦實任者不支薪水候補有照章開支設總教習一員及提調一員會同督率研究教習暫設二員洋教習經費過鉅暫不延訂擬于他省法政畢業生中就近訪聘學員額設四十名同通州縣三十名內分十五名為內班十五名為外班佐雜十名內分五名為內班五名為外班內班酌給津貼即將同通州縣原有月課獎銀改撥充用佐雜人數過多在館額數有限仍酌留月課以示體恤本省紳士亦准附入肄業額定二十名照直隸稍為變通令其酌繳學費綜計委員學員薪水津貼飯食及館役工食各項額支節節核計常年需銀一萬一千六百餘兩除撥用課吏館原支銀六千六百兩外每年尚需添籌五千餘兩開辦經費約需五百兩一切活支不在其內統由臣督司設法籌措作正開銷據布政使瑞良按察使鍾培會同課吏館道員詳請具奏前來除飭令擇期開館由臣隨時督率認真辦理並將章程分咨政務處學部吏部刑部查照外所有豫省改設仕學館暫行試辦士學速成科緣由理合恭摺具陳伏乞 皇太后 皇上聖鑒訓示謹 奏奉 硃批該衙門知道欽此

浙江巡撫臣張曾敭跪 奏為已故訓導學行粹純請從祀名宦祠以彰 盛典恭摺具陳仰祈 聖鑒事竊准禮部咨據陝西道監察御史朱錫恩等聯名呈稱已故浙江海甯州學訓導錢泰吉于同治二年病故當經已紳呈請從祀名宦適值禮部釐定新章須故三十年後方能辦理計至光緒二十五年已滿年限復因該故員之子工部尚書錢應溥

雖已告病蒙 恩賞俸與現任無異該故員從祀之處應 應應溥身故後再行辦理茲查錢應溥已于二十七年在籍病故此外並無現任九卿子孫呈請核准以光祀典由部咨行到浙轉飭地方官確查詳辦去後茲據兼署布政司督糧道顏鍾驥詳據杭州府轉據海甯州詳據在籍紳士翰林院檢討吳淩宜等造具已故訓導錢泰吉事實冊結具報該訓導前在海甯州倡築學宮修明祀事相度地勢浚治城河究心水利著為論說並搜輯先哲遺書多種表彰孝節烈千人創修海昌備志五十餘卷先後為學宮主講席三十四年成就子弟後進甚眾應請將錢泰吉從祀名宦祠等情遞由州府加結詳司轉詳請 奏前來臣查已故訓導錢泰吉修教明倫著書經世負師儒之重望為士夫之楷模沒世不忘羣論翕服現據公請從祀名宦既屬名實相符合無仰懇 天恩俯准將已故海甯州學訓導錢泰吉從祀名宦祠以昭矜式除將冊結咨送禮部查核外理合恭摺具陳伏乞 皇太后 皇上聖鑒謹 奏奉 硃批禮部議奏欽此

調補江蘇巡撫兼管河工事務臣陳夔龍跪 奏為總兵在營積勞病故懇 恩賜卹恭摺仰祈 聖鑒事竊照分統河南豫正左軍四川重慶鎮總兵韓立本於光緒三十一年八月內在許州防次積勞病故業經 奏報在案伏查該總兵壯歲從戎於同治初元以俊秀管帶新蔡縣練勇維時粵匪大股攻撲城四十餘日該總兵奮勇搏戰力保危城以經制外委歸標拔補是為立功之始嗣後投効嵩武軍屢選軍鋒首先陷陣大周集之戰衝賊中堅十盪十決勇為諸將之冠復隨軍轉戰諸行省蕩平捻回各逆收復新疆全境疊以勞績優邀獎叙積功保至以參將留河南原省儘先補用光緒四年經前山東撫臣張曜委帶嵩武親軍前營駐防道口歷署衛輝汝甯等營參將十九年補授汝甯營參將調署永城營暨撫標中軍參將接統豫正左軍護理歸德鎮總兵升補信陽協副將以擒獲泌陽開教首要張漢卿之案經升任撫臣錫良 奏請開去副將底缺以總兵記名簡放欽奉 諭旨俞允該故總兵歷任軍營均為各路將帥所倚重自 統豫正左軍巡防豫南一帶以來在防次數年聯絡鄂省客軍防護鐵道綿延千有餘里遇事捕剛協柔智略兼優保衛地方無論寒暑一聞盜警立即躬親督捕是以士卒感奮屢獲渠魁地方賴以乂安匪徒因而歛迹實為豫省各軍得力之員本年四月蒙 恩簡放四川重慶鎮總兵該故總兵感荷 聖恩方將力圖報稱而積勞過甚未及接授兵部行知遽在許州防次病故當此整軍經武之際失茲良將殊堪惋惜據布政使瑞良轉據該州知州端錦稟詳請 奏懇 恩賜卹前來臣查光緒二十九年間記名總兵王世清在營積勞病故經山東撫臣奏請議卹奉 旨允准在案該故總兵事同一律合無仰懇 天恩俯准敕部將已故四川重慶鎮總兵韓立本照軍營立功後積勞病

故例議卹出自 鴻慈逾格除將該故總兵履歷咨部查照外謹恭摺具陳伏乞 皇太后 皇上聖鑒訓示 謹 奏奉 硃批着照所請該部知道欽此

戶部等部謹 奏為循案核議具奏恭摺會陳仰祈 聖鑒事內閣抄出熱河都統松壽奏承德府并所屬光緒三十年分經徵地丁正耗當雜稅等項銀兩已未完各數暨民欠未完銀兩另揭請參遵照改題為奏一摺光緒三十一年六月初七日奉 硃批戶部知道冊併發欽此欽遵鈔出到部併據該都統造具清冊送部前來 戶部查道光七年據前任直隸總督那彥成奏准熱河錢糧事件照甘肅鎮迪道之例由熱河道督催熱河都統題咨於道光九年據該督題請將承德府並所屬州縣徵解熱河道庫地糧正耗等項錢糧均照數存留道庫備用仍於年前估計不敷銀數開具欸單叙作不敷經費名目由道具詳都統轉咨直隸總督核明籌撥又承德府屬徵收當雜稅斗稅等項銀兩向係解司入撥作為橋道經費之用仍令熱河道照解交直隸藩庫報部撥用又承德府地糧耗羨並當雜稅斗稅以及內結各項錢糧均於道光八年為始在於奏銷案內剔除由熱河道分項核造奏銷經呈都統具題又光緒六年正月間戶部於陳籌備餉需摺內嚴核奏銷一條聲明各項奏銷各依定限令該督撫一面具題一面先將未完一分以上各員開單專摺奏報由部核定處分先行覆奏仍於題本案內將業經具奏各員聲明備核光緒十一年八月間戶部奉令各省督撫自光緒十二年起按年於辦理奏銷時隨同地丁清冊另造當稅一冊報部即聲明稅銀全數於奏銷前徵解清完仍照章報撥動用如有欠完之數責令該州縣等照數賠補並照不作分數難稅欠解例分別開參均經奉 旨允准由部通行遵照各在案又於光緒二十七年八月十五日奉 上諭嗣後缺分題本向來專題之件均著改題為奏等因欽此欽遵亦在案今據熱河都統將承德府併所屬州縣光緒三十年分經徵地丁當雜稅等項銀兩已未完數目造冊奏銷查冊開額徵地糧正銀一萬九千一百六十二兩三錢三分九釐三毫九絲三忽七微耗銀一千九百十六兩二錢三分三釐九毫三絲九忽三微七纖內除平泉豐甯二州縣民欠未完起運正銀三千零九十七兩一錢九分七釐零五絲六忽七微耗銀三百零九兩七錢一分九釐七毫零五忽六微七纖另揭請參外計各屬徵完起存地糧正銀一萬六千零六十五兩一錢四分二釐三毫三絲七忽耗銀一千六百零六兩五錢一分四釐二毫三絲三忽七微內存留平銀一萬零二百六十二兩四錢零三釐零六絲又批解道庫起運地糧正銀五千八百零二兩七錢三分九釐二毫七絲七忽起存耗銀一千六百零六兩五錢一分四釐二毫三絲三忽七微等語戶部查前項額徵正耗銀兩核與歷年奏銷實在徵銀

數相符留文俸工工料銀兩按冊核算亦與無間之年應支銀數相符應毋庸議民欠未完地糧正耗銀兩既據該都統開揭請參應於後款會同吏部核議其各屬批解正耗銀兩轉飭造入光緒三十年收支冊內送部查核一應徵舊開當舖應繳及吏商改號新開當舖應交當稅共銀二千八百二十兩內承德府屬舊開當舖除開闢五座已交過銀五兩每座補交銀四十五兩共銀五百四十兩又新開二座應交銀一百兩建昌縣屬舊開當舖除開闢一十二座已交過銀五兩每座補交銀四十五兩共銀五百四十兩又新開更商三座應交銀一百五十兩赤峯縣屬舊開當舖除開闢五座已交過銀五兩每座補交銀四十五兩共銀四百五十兩又更商改號新開八座應交銀四百兩圍場廳現開一座應交銀五十五兩又承德府屬平豐甯二縣應解五行斗稅及府州各縣房地稅共銀七千六百三十三兩二錢九分六釐七毫九絲六忽五微八纖內前署府曹景鄴應賠解銀七十七兩九錢零四釐九毫又前代理府耀順應賠解銀一千三百四十六兩一錢七分又現任知府英啟應賠解銀二千零五十九兩七錢三分零三毫三絲均俟賠補足額彙解尚計應解銀四千一百四十九兩四錢九分一釐五毫六絲六忽五微八纖共完解銀四千一百四十九兩四錢九分一釐五毫六絲六忽五微八纖等語戶部查前項當雜稅項下承德府應賠五行斗稅共銀三千四百八十三兩八錢零五釐二毫三絲據稱均俟賠補足額彙解應令熱河都統嚴飭各該員將應賠缺額斗稅銀兩趕緊照數賠解交道庫兌收毋得遲延至承德府併各州縣完解當雜銀二千八百二十兩又雜稅及五行斗稅共銀四千一百四十九兩四錢九分一釐五毫六絲六忽五微八纖曾否批解司庫未據聲明應令直隸總督轉飭提解藩庫入撥報部查核一未完地丁正耗項下內平泉豐甯二州縣民欠未完起運正銀三千零九十七兩一錢九分七釐零五絲六忽七微耗銀三百零九兩七錢一分九釐七毫零五忽六微七纖據該都統開揭請參等語戶部查前項平泉豐甯二州縣未完一分以上正耗銀兩前據該都統遵照新章開單奏報業經臣部會同吏部核議在案此次毋庸再行覈議謹

分其經徵未完不及一分並督催各官仍照原揭議處吏部查定例地丁錢糧經徵州縣官欠不及一分者停其升轉罰俸一年欠一分者降職一級欠二分者降職二級俱令戴罪徵收知府道員欠不及一分者停其升轉罰俸六箇月欠一分者罰俸一年巡撫欠一分者罰俸一年俱令戴罪督催又各官承督未完案件於限內離任者以罰俸一年完結又特旨升調各官原任內有未完案件其應議以罰俸六箇月者照原處分議結各等語除前署承德府知府護理熱河道曹景邨已故毋庸議外應請將經徵光緒三十年分地糧銀兩初參未完不及一分之前署平泉州知州王志祥照例停其升轉罰俸一年未完一分以上之前署平泉州知州李秉和現署知州曹振循照例各降職一級未完二分以上之現任豐甯縣知縣羅燮陽照例降職二級俱令戴罪徵收王志祥李秉和已於限內卸事應照離任官例各罰俸一年完結督催初參未完不及一分之前熱河道錫恒恩霖前護道英啓現任道謝希銓代理承德府知府耀順均照例停其升轉罰俸六箇月督催初參未完一分以上之熱河道統松壽罰俸一年戴罪督催耀順英啓俱於限內卸事應照離任官例各罰俸一年完結英啓又於承德府知府現任內經徵未完一分以上應照例再罰俸一年戴罪督催錫恒已升科布多辦事大臣恩霖已升廣東鹽運使應照 特旨升調官例各罰俸六箇月完結仍令熱河都統將前項民欠未完正耗銀兩嚴飭該州縣趕緊催徵完解毋得遲延一扣師生空缺銀三兩六錢四分二釐九毫夫馬小建銀十五兩四錢八分六釐孤貧小建銀五兩四錢等語戶部查前項應扣師生空缺等項按冊核算數目相符應令轉飭造入光緒三十年收支冊內送部查核毋得遺漏所有臣等循案核議緣由理合恭摺會陳伏乞 皇太后 皇上聖鑒再此摺係戶部主稿會同吏部辦理合併聲明謹 奏光緒三十一年十二月十八日具奏奉 旨知道了欽此

都察院謹 奏為請 旨事竊照 京察保送一等額保按員缺多寡例定於七員內保送一員查臣衙門漢御史都事經歷五城正副指揮吏目計四十五缺例准保送一等六員嗣經吏目五缺裁撤所有二十九九年 京察仍保送六員按七缺保送一員核計尚短二缺與例稍有未符經吏部奏請 欽定於光緒二十九年正月 十二日具奏奉 旨准其保送六員欽此今五城正副指揮又經裁撤計臣衙門漢御史都事經歷共三十缺額數較少惟五城甫經裁撤似未便沒其前勞茲屆光緒三十二年 京察之期可否仍准保送六員之處臣等未敢擅擬謹繕摺奏請恭候 欽定伏乞 皇太后 皇上聖鑒訓示遵行謹 奏光緒三十一年十一月二十六日具奏奉 旨依議欽此

文苑

岳陽

慶博如來稿

牌胸歸棹此登樓雲夢圓光望裡收千古壯懷憂與樂四圍涼意夏如秋樽前時泛君山影檻外招來大月浮鐵笛一聲花盡落雁行南去水東流

夔州

羣雄崛起又張韓辛苦宮廷號永安形勝舊傳魚復浦樓船曾下虎須灘支持蜀漢天非薄控制東南水亦湍四望不勝秋色老臥龍山上夕陽寒

武昌

白雲猶亘夕陽天黃鶴飛來憶昔年大別山光浮檻出荆江波浪落尊前六朝名士工題賦三國羣雄此泊船不見高樓峙磯左臨風徒自奮空拳

潯陽

煙草寥落不勝秋訪古題詩四壁留九派江聲司馬淚一天秋意美人愁黃蘆苦竹昔年宅楓葉荻花何處洲聞道龍開河上事重新傑構起層樓(聞亭已新構)

甘棠湖水碧淪漣楊柳欹斜鎖翠煙陳迹惟看千里月餘音猶問四條絃十年心事陶彭澤萬古詞人白樂天回首不堪成隔世潯陽江上記停船

蘭陽

四圍山色鬱崔嵬百丈祥光出鳳臺日上翠鱗松爪活天邊寒陣雁聲來將軍神武千秋轟(石將軍峙立山半)少保威名三代才(威南塘有碑立關門上)獨上高岡振衣履鳳雲佳氣夕陽開

冷入秋雲萬草黃登臨天際自蒼茫河聲東去通滄海山勢西來接太行古徑礙人顛亂石野鷹翻翻下邊牆南塘一去無陳迹剝落殘碑臥夕陽

戶部銀行報告代收國民捐清單

捐戶姓戶

銀數若干

崇室載澄之妻赫舍哩氏

庫平足銀一百兩

宗室戰澐之妻項氏吳氏

商部左堂唐文治

商部右堂顧肇新

商部右叅議熙彥

前署實業學堂監督商部右叅議熙彥

商部員外郎祝瀛元

慶親王次子頭品頂戴載璲

頭品頂戴載璲之妻

戶部郎中蘭泰

陳炳鏞

戶部員外郎管象頤

管象頤之妻管殷氏

漢鑾儀使仁初捐春季俸銀

都察院都事陳壽衡

都察院都事陳子實

陳王氏

女學生陳汝靖

女學生陳汝鐘

女學生陳汝鐸

女學生陳廣之

榮林班妓女桂蘭

富珍

共捐庫平足銀五十兩

庫平足銀一千兩

庫平足銀一千兩

庫平足銀五百兩

庫平足銀一百兩

庫平足銀一百兩

庫平足銀二百兩

庫平足銀一百八十七兩八錢

庫平足銀九十三兩九錢

庫平足銀九十三兩九錢

人洋一元

庫平足銀三十二兩七錢一分

龍元十元

龍元二十元

龍元二元

龍元二元

龍元一元

龍元一元

英元五元

龍元五元